

## COMUNICÂT STAMPE

### DE ANNA AL INCUINTRE ENTS RICOGNOSÛTS PAL 2012 IMPEGNÂTS PLUI DI 500 MIL EUROS

Udin, ai 22 di Jugn 2012 - Un salt di cualitât dai projets - inovatîfs e condividûts in rêt - e te cure de rindicontazion. Al è chel che al à domandât l'assessôr regionâl ae Culture Elio De Anna ai rapresentants dai dîs ents ricognosûts pe promoziun de lenghe furlane, ven a stâi chei sogjets publics e privâts che la leç regionâl di tutele e considere cuntune speciâl funzion in vie de ativitât cualificade e continuative par pandi il furlan.

De Anna al à incuintrât te sede de Region a Udin i rapresentants dai ents dutun cu la Arlef-Agenzie regionâl pe lenghe furlane e il diretôr dal Servizi corejonâi dal forest e lenghis minoritaris, Giuseppe Napoli, cul fin di cognossi lis problematichis e individuâ lis soluzions pal avignî.

Tal 2012 pes svariadis ativitâts dai ents primariis a son stâts impegnâts (leç 29/2007) 535 mil euros ripartîts jenfri Radio Spazio 103 (32 mil euro), Radio Onde Furlane (69 mil), Societât sientifiche tecnologjiche furlane (10 mil), Istitût Pre Checo Placerean (30 mil), La Patrie dal Friûl (30 mil), La Grame (23 mil), Colonos (31 mil), Glesie Furlane (25mil). Ae Societât Filologjiche Furlane, che e à un finanziament di pueste, à son stâts assegnâts 260 mil euro. Infin, tal assestament di bilanç 2012 e je stade proviodude la some di 25 mil euro a pro de Kappa Vu sas.

"Al covente un salt di cualitât ", al à comentât De Anna, comunicant la prossime decision di fissâ un tet pes spesis di funzionament (plui o mancul dal 25 par cent) par liberâ il rest des risorsis par meti in vore i projets.

De sô bande la Region, par mieç dal sfuarç organizatîf dai uficis dal Servizi, al è rivât a puartâ un grant vantaç pe operativitât des associazions in grazie de acelerazion de rindicontazion e de relative rapide aprovazion dal decret di ripart ai prins di Avrîl.

Un sfuarç che ducj i rapresentants dai ents a àn preseât une vore considerantlu "impuartant par la serenitât dal lavôr des associazions e par evitâ di strassâ lis risorsis in forme di interès bancjariis cuant che si à di domandâ un acont". I ents si son considerâts dacuardi cun de Anna su la oportunitât di une regjie di coordinament che e podarès jessi fate de Arlef, daspò un decentrament di funzions.

Dal president de Arlef Lorenzo Zanon e je rivade la plene disponibilitât a davuelzi chest rûl favorint la sinergjie "che, dal rest, - al à notât Zanon - e je bielzà stade inviade par esempli cun l'event de leture continue de Bibie ma ancje cu la Farie teatrâl che e

viôt la Agenzie tant che sogjet coordinadôr di cutuardis ent tal setôr de formazion, produzion e scritture teatrâl in lenghe furlane".

"Massime disponibilitât a cjatânus par meti in vore projets plurienâi e articolâts", al à concludût Zanon, ricuardant che ancje "la inmagant idee di puartâ a Udin la sede de Agenzie europeane pes lenghis minoritaris e je une partide di zuiâ ducj insiemit".

CUN PREIERE DI PUBLICAZION E DIFUSION

Info. 0432 555724  
[www.arlef.it](http://www.arlef.it)